

【失敗个經驗】李得福原作

記得讀三年生个時節，有一日放學轉去，看著天色會暗了³²，
 佢就學洗米煮飯。雖然從來無煮過飯，毋過佢記得吾姆軚軚講：「
 一杯米放一杯水，洗米、洗菜最少愛洗三遍。」吾姆講个這兜話
 ，平常時佢毋會特別去記起來，唉！今晡日嘎用得著了，就像書
 肚講个：「眼看千遍，不如手做一輪。」佢將米洗淨後，放入電鑊
 肚煮。

佢心肝肚緊恷，這係佢第一擺煮飯，等一下鑊仔肚个飯係煮
 好了，定著香噴噴仔，特別有味緒。哪知，時間到了，鑊蓋打啊
 開，阿姆哀！電鑊肚个飯還半生熟，有兜鬆鬆、有兜黏黏，全部
 食毋得。仰會恁樣呢？打電話問吾姆，原來就係佢無在電鑊肚放
 一杯水，故所變到燥煮。有米煮無飯，還見笑，有咁這擺个經驗
 過後，下二擺佢就毋會毋記得放水了。有這擺失敗个經驗以後，
 佢做事情以前總會多恷，多想各種可能發生个狀況，事先考慮周
 全。

無想著，恁樣細心細意，還本本會失敗。有一擺，學校舉辦
 跳索仔比賽，比賽个項目有單人組、雙人組、三人組。先生推派
 佢摻另外兩個同學代表班項去比賽。為著這擺个比賽，也為著愛
 拿著好成绩，逐日下課个時節，佢就會主動湊同學去操場練習，
 變化跳法，轉換方向，加強練習。

到正式比賽个該早晨，全校个學生仔都圍在操場脣，看著恁
 多人，佢心肚偷偷仔歡喜，因為定著會贏。心肚恁樣想，其他个
 事情就無閒去多加注意了。比賽開始了，因為忒有自信，兩隻手
 拂索仔个力道無平均，跳無幾多下就卡索仔、停下來了。第二擺
 再過跳，還係共樣失敗了。接等个雙人組得著第三名。三人組个
 ，又因為配合毋好，正得著第四名定定，自家敗勢到面紅濟炸，
 頭犁犁毋多敢看人。

經過這兩擺个失敗，佢正如著頭擺人講个：「學術毋精、驕兵
 必敗。」也了解著自家失敗最大个原因，都係毋罣沉穩，忒容易
 驕傲，忒容易看輕天下个事情。從該兩擺个失敗經驗以後，佢變
 到還較細義。接受任務以前，頭腦總會先考慮清楚。最重要个係
 佢接受失敗、會記得失敗帶來个教訓。下二擺，佢會較熱猛、較
 認真行向成功之路。

³² 表完成的語尾助詞。四縣腔有 le'、le'、lio'、lio'……等不同讀音，讀者可依文章情境，自由詮釋發揮。以下同此注釋說明。